





Oude en Nieuwe Boekhandel

VAN

**FREDERIK MULLER**

**AMSTERDAM,**

HEERENGRACHT, KK.Nº. 130.



32012/17  
Page XXXVIII, 3  
160346500  
45

Argumentum  
pro Veritate Religionis Christianæ  
**EX MIRACULIS**  
desumptum,

ab iis autem,  
qui eadem ope Satanæ patrari contendunt  
haud parum labefactatum,

*Hac vero Dissertatione Theologicâ  
nativo nunc robori restitutum,*

*Anniente summo Numine*

PRÆSIDE

**DN. JOH. ARN. NOLTENIO**

Theol. D. & Prof. O.

Coetusque Reformati Pastore Ordinario,

*Fautore ac Præceptore suo omni observantia cultu æter-  
num prosequendo,*

Ad D. III. Eidus Novembreis

H. L. Q. S.

pro virili tuebitur Respondens,

**CLAUDIUS JOH. TRINQUAND,**  
Hamburgens.

\*\*\*\*\*:\*\*\*\*\*;\*\*\*\*\*

FRANCOFURTI ad VIADRUM,

Typis descripsit JOH. CHRISTOPH. SCHWARTZ.

clō lōcc xlii.

Digitized by the Internet Archive  
in 2018 with funding from  
Wellcome Library

<https://archive.org/details/b30345844>





ΣΥΝ ΘΕΩ.

*Dissertatio*  
de Miraculorum auctore unico  
DEO O. M.

CAPUT PRÆLIMINARE.

*Scripti occasionem & scopum indicans.*

§. I.



Nter præcipua sanctissimæ fidei nostræ firma- §.1. *Ami-*  
menta quibus Christianæ religionis veritas *raculis re-*  
contra infidelium cavillationes asseri ac de- *cte petitur*  
fendi potest, haud infimum locum obtinere *argumen-*  
*Miracula*, quæ primitus Prophetæ, dein sum- *tum pro*  
mus Prophetæ ipse æternus DEI filius, tum *veritate*  
& hujus auctoritate ac nomine Apostoli, *religionis*  
primorum denique temporum fideles, fre- *Christia-*  
quenter ediderunt, nemo inficiabitur. Non *na.*

de nihilo est quod passim sacras literas eo  
provocare videas, quodque ii quorum ministerio Deus ad patefaci-  
enda consilii gratiæ arcana usus est, non modo hac facultate mira-  
cula patrandi fuerint præditi, sed & eorum testimonio in persuaden-



dis ἀπίστοις nixi sint. Ita Deus Mosi fidem apud populum Israeliticum conciliat Exod. IV. 1 -- 9. His Elias a vidua Sareptana *Vir Dei*, per cujus os *Jehova* veritatem loqueretur agnitus est 1. Reg. XVII. 24. Hoc κριτηριῳ Nicodemus Christum διδασκαλον a Deo exivisse persuadebatur, quod nemo hac signa edere posset, quæ ipse faceret, nisi cum ipso Deus esset Joh. III. 2. Neque dubitavit servator ipse, miranda quæ fecerat opera ut insigne divinæ missionis suæ argumentum proponere Joh. V. 36. X. 37. 38. XIV. 11. Eandem demonstrationis viam & Apostoli sequuntur, inter veritatis testimonia subinde signa & prodigia memorantes Hebr. II. 4. & alibi. Hinc suo merito quoque, omnes quos quidem mihi legere contigit, Christianæ veritatis πειρασμοί, miraculis locum inter doctrinæ sacrae fulcimina assignant, atq; his armis Atheos, Deistas, Judæos, Muhammedanos, omnesque veritatis Christianæ hostes debellare satagunt haud infeliciter.

§. 2. Illud  
infringi  
videtur, si  
conceda-  
tur eadem  
a Satana  
fieri, aut  
Spiritu  
seductori  
operanda  
permitti.

§. 2. Felicius autem, meo saltem judicio, his usi fuissent, nisi ipsi qui hoc tibicine veritatem fulcire nituntur, argumenti istius robur infringerent, passim concedentes etiam Satanae ac Pseudoprophetae quandoque a Deo facultatem miracula patrandi indultam, idque ipsam Scripturam Sacram docere existimantes. Præcipue in iis Scriptoribus id observatur, qui cum Pontificiis, fictitia sua miracula semper jaçantibus, & in iis causæ desperatæ præsidium quærentibus, congressi sunt; ut facili manu, Deum ad tentandum populum suum etiam per hos pseudoprophetas miracula operari largiantur: ideoque non tam miracula, quam doctrinam ipsam cui confirmandæ ista prodigia fiant, esse examinandam, sæpissime inculcent. Multis Ecclesiæ nostræ haud infimi nominis Doctoribus hanc animo sedisse sententiam facili negotio posset ostendi. In præsentia vero, ne copiosis horum scriptorum testimoniis lectori molestus sim, unicum tantum appellabo Coccejum cujus insignia in Ecclesiam sunt merita, sed cujus auctoritas hoc seculo nostro nimium forte valet apud plurimos. Is in *S. Scripturae Potentia* Cap. VII. sæpissime Pontificiis largitur, Deum per vera miracula nonnunquam mortales tentare. Sic §. 39. *Non abnuit vera esse quæ de miraculis Capucinatorum narrat Valerianus, atque in iis severitatem Dei se adorare dicit, implentis quæ prædicta sint Matth. 24, 24. 2. Thess. 2, 9.* Et §. 46. ait: *Miracula sola, quæ Christus patravit in diebus carnis, si non fuissent sociata verba quæ Christum oportebat loqui, non probarent*



rent nobis verum Prophetam. Idem §. 48. *Inconsiderantiam & lapsum* dicit quod Valerianus scripserat : *Si miracula edantur in testimonium falsæ doctrinæ, facessat Jesus cum suis operibus, ego vel ero Judæus, vel Philosophus in puris naturalibus.* Quamvis vero §. 51. videatur Pontificiorum vaticinia ac miracula (ut decebat) pro imposturis habere; causam tamen hanc brevi deferit §. 52. dicens *Christum per quoscunque nominatum posse facere, & fortasse facere inter infideles miracula.* & post paulo addit : *Neq; ego putaverim indignius Deo ut tentet per proprium opus, quam per opus creatura; non magis quam Deus non indecore hominem facit ex occasione scortationis, aut permittit elementa moveri ad nutum Diaboli savientis.* Quæ verba nollem magno huic viro excidisce. Hæc enim si concedamus, non video, causam nostram magnopere miraculis juvari, siquidem Deus optimus, suam etiam omnipotentiam Satanæ ejusque instrumentis commodet, ut per eam impii in errore detineantur. Neque perspicio, quam ob causam tam eximiis omnemque naturæ ordinem longe excedentibus operibus legatos suos comitari voluerit, si & Satanæ emissariis eandem facultatem, confirmandis mendaciis suis concesserit. Neque oportebat ut Pontificios debellemus, arma a Judæis mutuari, quibus nos ipsos jugulemus. Notum quippe est, hunc populum ἀπειθεῖν & ἀνίλεγον, cum insignia Jesu nostri miracula negari nequeat, eadem vel incantamentis vel nominis ἀνεκφώνησιν nuncupatione patrari potuisse, Deumque hoc pacto populum suum tentasse, pertinaciter contendere. Quibus certe nimium concedunt illi ex nostris, qui vel Satanæ ope supernaturalia opera posse a Pseudoprophetis produci, vel Christum ipsum per quoscunque nominatum miracula facere, concedunt.

§. 3. Fateor, me nunquam satis hæc potuisse concoquere. Quo- §. 3. *Itaq;* tiescunque hæc meditatio animum meum subiit, toties miratus sum, *hæc sen-* hanc in Dei sapientiam ac bonitatem tam injuriam sententiam tot *tentia re-* sequaces reperire, ut ferme inter receptas numeretur. *jicitur.* Serio itaque examinandum esse ratus sum, quidquid & sacræ literæ & sana ratio de miraculis docent. Subductis calculis in eam concessi sententiam, quæ Deo soli veri nominis miracula tribuat, & utut fictis ac ementitiis signis ac prodigiis sceleratos in errore obdurari permittat, nunquam tamen ipse præter naturæ ordinem aliquid operetur, quod suapte natura ad excœcanda hominum ingenia destinatum sit.



§. 4. *Non auctori- te sed ra- tione.* §. 4. Neque, ut spero, quisquam mihi dicam scribet, quod in re tam ardua tritam & ab omnibus ferme Theologis calcatam viam deferam. Veritatis Studiosi nudam eam amplectuntur, quamvis ab omnibus destituatur. Qui auctoritatis præjudicio moventur, eos hic non moror. Non omnes videmus omnia. Et si forte & mihi heic errare contingat, qui humani nihil a me alienum puto, non ero monitoribus asper; modo ne sola auctoritate aut quod pejuse est convitiis pugnent. Ponderi argumentorum non numero oppugnantium lubens cedam. Faciliorem autem ab æquis rerum arbitris me impetraturum esse veniam spero, quod solus sine Duce ac comite hanc viam ingressus sim. (a)

§. 5. *Dis- sertationis methodus.* §. 5. Sed ut ad propositam quæstionem revertar, cum ea non nisi Scriptura Sacra & ratione sana arbitris definiri queat; Primum ipsam Miraculi vocem rite describendam esse puto, ne de re ambigua inutilis sit disceptatio. Itaque quid sit veri nominis miraculum, quænam ejus *κρίτηρια*, qui fines brevi demonstrabitur. His in clara luce positis, non tantum solo Deo auctore, sed nec aliter nisi finibus se suaque majestate, sapientia, ac bonitate dignis, fieri miracula ex ratione sacrisque docebo literis; atque hæc capite primo continebuntur. Alterum vero complectetur brevem objectionum considerationem, quibus frustra hæc veritas impugnatur. Neque de præfenti Dei auxilio dubito, cum ipse *καρδιογνωστης* norit, non alio fini hæc a me scribi, nisi ut istius nomen qui solus mirabilia facit glorificetur.

SECT.

(a) Ita scripseram ante quam ad manus meas pervenissent Cl. Sam. Werenfelsii *Dissertationes Theologicae*. Impense autem mihi gratulatus sum, posteaquam a Cl. D. Hermannno Matheseos olim Patavii nunc heic Francofurti ad Viadrum Professore Dignissimo istius libelli mihi copia facta est, Theologum hunc celeberrimum mecum sentire, atque efficere ne solus hic incedam. Idem enim argumentum *Diff. V. Num Miracula certa sint Veritatis signa?* solide pertractavit. Et parum abfuit, quin hæc meditationunculas meas supprimendas existimarem, ne Iliada post Homerum scriberem. Verum cum non uno ictu errores debellentur, & quædam accuratius hisce cogitationibus meis expensa sint, quæ Vir ille laudatissimus verbo tantum tetigit, non inutilem me veritatum sacrarum ruspatoribus navaturum esse operam arbitratus sum, si & hæc schedas doctorum examini subjicerem.



## SECTIO I.

*Sententiam nostram exponens & defendens.*

### §. I.

**S**I cum Christianæ veritatis hostibus mihi hic res esset, ante omnia demonstrandum mihi foret, talia opera quæ miracula vocantur vere facta fuisse, neque delirantium somniis, vel impostorum fallaciis, vel plebi denique credulæ, suos debere natales. Verum cum Christianis scribam, quos de veritate horum prodigiorum quæ sacris saltem clare narrantur paginis dubitare nefas est, cumque hoc argumentum jam a quamplurimis egregiis viris sit occupatum, qui Christi & Apostolorum miracula a Judæorum calumniis, Mosis autem & Prophetarum a profanorum cavillis, strenue defenderunt, labori huic secure supersedere possum.

§. 1. *Veritas miraculorum præsupponitur.*

§. 2. Supposita itaque miraculorum *existentia*, ut cum Scholasticis loquar, eorum *essentiam* definire necesse erit, quæ quidem ex voce ipsa cognosci satis nequit. *Miraculum* enim id omne dicitur, quod in admirationem rapit, *Ostentum* vero *portentum*, *monstrum*, *prodigium*, *cibus vix* quod aliquid ostendit, portendit, monstrat, prædicit. *Cic. de Divin. I. 42.* quæ cum ab hominum opinione nomina data sint, in rei ipsius veram cognitionem nos haud deducunt. Neque in solis quibus sacra Scriptura utitur vocibus multum præsidii situm esse putem ad rei naturam accuratius determinandam, cum מֵוֶדָּע Hebræorum in genere omne signum denotet, in medio relinquens an sit supernaturale nec ne, מֵוֶדָּע quamvis aliquid portentosum sonet, non tamen, ut Cl. Cocceji verba mea faciam, *in eo semper spectetur admirabilitas ex parte potentia, sed etiam ex parte consuetudinis & decoris, quod insolitum sit & in oculos incurrat, dubitantibus spectatoribus, quare & quo consilio id fiat*: Neque ipsa מֵוֶדָּע ac מֵוֶדָּע quamvis maxime de mirandis Dei usurpentur, aliam nobis fere notionem ingerunt, quam rerum quæ captum nostrum excedunt, quarum vel causas vel modum vel fines ignoramus. Græca vocabula eandem fere habent ambiguitatem: *σημεια & τερατα* vocantur, quorum prius signum, alterum vero in-

§. 2. *Quid sint miracula ex voce cognoscitur.*



solitum aliquod exprimit; *δυναμεις* propiorem ad divinam operationem respectum habent.

§. 3. *Non omnia miracula sunt*

§. 3. Si omnia illa in Miraculorum censum referre vellemus, quæ ignorantes attonitos tenent, mirum in modum miraculorum numerus augendus esset, qui tanto major futurus, quo majori caligine mentes spectantium obnubilatas reppererint. Sic vir doctus rudioribus est instar miraculi. Pii omnes, Christi submissum imitantes animum, terrena spernentes, in cœlis *πολιτευομενοι* & in quibus observare licet illa *εναντιοφανη*, quæ Paulus enumerat 2. Cor. VI. 8. 9. 10. mundo haud immerito sunt in signa & prodigia. Quin & omnes artes longius a vulgi cognitione remotæ, si quid insoliti per illas præstetur, ignorantes in stuporem vertunt, ut vel divini vel magici quid subesse suspicentur. Artem pyrothechnicam vel typographicam si quis veterum assecutus fuisset, haud difficulter pro nmine aliquo habitus esset, quod lepida fabula Frischlinus quondam præsentavit. Neque dubium est, eos, qui magicis artibus stupendos produxerunt effectus, inscitia admirantium quam maxime abufos fuisse. Ex hisce tuto concluditur, non ex hominum captu metienda esse miracula.

§. 4. *Vera miraculi definitio ex S. Sacra.*

§. 4. Ex ipsa potius rerum natura haurienda est miraculi definitio, quam ipsæ nobis suppeditare videntur sacræ literæ; Nicodemus illud describit *εργον* vel *σημειον* *ὃ ὁδεῖς δυνατὰ ποιεῖν, εἰ μὴ ὁ θεὸς ἢ μετ' αὐτῶν* Joh. 3. 2. Unde liquido colligere licet esse demum veri nominis miraculum, *Opus ex quo colligi potest Deum esse cum aliquo, quod non secundum ordinarias naturæ motusve leges aut ullis creaturæ viribus, sed solâ παντοκράτορος efficitur potentia, ad confirmandum voluntatis suæ testimonium.* Non equidem hæc definitio ad superstitionis Scholasticorum *ακριβειαν* concinnata est, quam paulo feliciora secula nostra inter futilia referunt; non putem tamen majori me quam Sacrarum literarum auctoritate ad eam stabiliendam indigere, cum primis quod in hodiernorum Theologorum scriptis, eam passim adoptari reperiam, quamvis eam postea hoc ipso asserto, quod confutandum mihi sumsi, deferant. Neque huic miraculorum descriptioni contradicit Connor, in *Evang. Medici*, definiens miraculum: *Effectus productos per suspensionem legum motus, a summo legislatore conditarum, eo ipso enim concedit hæc motus leges a nemine nisi summo legislatore suspendi posse.*  
Reve-



Reverendissimus Cantuariensis Archi-Præsul Tillotsonius Orat. Sacr. Vol. 2. pag. 495. & 496. ad miraculum sufficere putat *effectum illum excedere vires naturales creaturarum nobis cognitarum*; cum dignoscere nos nequeamus, an opus aliquod stupendum virtute angelica, humana majore, an vero divina, productum sit; cumque si miracula soli Deo auctori tribui deberent, incertum semper futurum sit, quænam opera pro miraculis habenda sint, nec ne. Sed hunc metum insequentibus excutiemus, neque propterea a Definitione miraculorum quam sacra dant literæ, nobis recedendum esse putamus.

§. 5. Ad hanc vero definitionem recte percipiendam duæ possunt §. 5. *Definitionis ex* institui viæ, quarum neutra difficultate caret. Vel enim omnium *planatio.* creaturarum vires earumque limites nobis perspecti esse debent, ut inde colligere liceat, quid naturæ motusque leges superet, nec ne: quantum creaturarum potentia vel singularum vel inter se junctarum valeat, quidve robur earum excedat: Vel examinandum nobis est, quid illud sit operis, quod summum Numen tanquam sibi privum & suum *αυχνη* sibi vindicet.

§. 6. Si quis priorem viam ingredi voluerit, omnium rerum §. 6. *Ad* creaturarum vires, ac quibus definiuntur cancellos examinaturus, *eam intel-* rem immensi operis, ad quam nulla ætas nec ulla seculorum quam- *ligendani* plurium experientia suffecerit, se aggredi brevi reperiet. Quotus- *non opus* quisque enim est, qui tantum corporum sublunarium, imo eorum *est, omni-* quæ quotidiano teruntur usu, naturam qualitates virtutesque ani- *um rerum* mo complexus sit? Quot non quotidie nova veteribus ignota a cu- *creatarum* riosis naturæ scrutatoribus deteguntur, quæ isti supra naturæ leges *vires per-* fieri credidissent? Quot non deperditæ rerum naturalium scientiæ ab *nosse.* antiquitatis studiosis denuo eruuntur? Multa sunt, fateor, quæ nostra ætas in apricum produxit, nec inutile est quod pervestigandis naturæ mirabilibus impenditur temporis & operæ. Sed quis est qui vel centesimam creaturarum corporearum partem se penitus perspicere gloriari possit? Major oculos nostros offundit caligo si Spirituum seu animorum seu mentium, substantiarum inquam rationalium virtutes metiri præsumamus. Ex arctissimis equidem quibus mentis nostræ potentia circumscripta est finibus, aliquid de reliquorum hominum animabus, in eodem nobiscum ordine positis, conjicere licet; At si Geniorum aut Dæmonum naturam examinandam nobis propo-



proponimus, rationem hic nos deferere, sacras literas quædam tantum quæ nos propius spectant declarare, multa vero in obscuro relinquare inveniemus. Utut enim his Spiritibus vires etiam ingentes tribuat, finitas tamen esse debere & ratio & Scriptura clamat. Tot itaque salebris ac senticetis cum hanc viam, examinis creaturarum, oblitam reperiamus, in ipso limine desperabundi pedem referimus.

§. 7. *Sed  
examinan-  
da sunt o-  
pera, quæ  
Deus sibi  
soli tribuit*

a) *Prædi-  
ctio futu-  
rorum.*

§. 7. Altera itaque calcanda est semita, quæ minus difficultatis habeat, quæque citius ad scopum nostrum nos deducat. Examinanda sunt, inquam, illa quæ παντοκρατωρ sibi priva esse voluit opera, quæque nisi ipso jubente a nulla creatura quantumvis potentissima fieri ullo modo possunt. Talia multa esse Dei αυχηματα ipso naturali docemur lumine. Exordium facerem a creatione seu productione rerum ex nihilo, quod certe opus soli Deo relinquendum, vulgare axioma clamat, quo *ex nihilo nihil fieri*, novimus omnes; nisi in eo probando inanem me operam sumere crederem, cum istiusmodi miraculi nullum suppetat exemplum, quo ex nihilo aliquid productum sit, postquam orbem totum creationis sextituo complevit summus opifex. Non desunt exempla productionis rerum ex materia ad id sua natura inepta, quæ sane creationi æquipollet, ut postea docebimus, sed eam creationem non vocabimus, ut in verbis vitilitigandi occasionem præscindamus. Ab iis itaque operationibus exordiar, quas ab intellectus perfectissimi natura proficisci necesse est, quæque omnium rerum etiam futurarum haud fallacem præsupponunt notitiam: futurorum contingentium puto prædictiones, eorum maxime quæ multis post seculis demum eventura sunt, quæque nulla creati ingenii etiam si solertissimi valet assequi conjectura. Et futurorum prædictiones, quas prophetias vocant sacræ paginæ, ei tantum deberi qui cor hominis formavit qui suo cuncta gubernat arbitrio, quique omnia sapienti consilio delineavit, quod nullis creaturarum conatibus irritum reddi potest, ipsa clamat ratio. Neque enim certo prædicere potest is, cui hominum consilia sunt incognita, cujus præscientia interventu causarum secundarum obscurari aut dubia reddi possit. Atque hoc validissime confirmant sacræ literæ, quæ non tantum mortalibus hanc corda & renes scrutandi & futura præsciendi facultatem omnino negant competere. Eccl. 9.



12. & 8, 6. 7. 8. eamque Deo tribuunt Gen. 41, 16. Ps. 7, 10. Jes. 42, 9. 46, 10. Rom. 8, 27. Apoc. 2, 23. sed & liquido neminem præter Deum solum futura cognoscere, atque hæc mysteria revelare affirmant Dan. 2, 27. 30. ita ut & idivinitatis sit argumentum Jes. 44. 6. 7. & gentium idola, seu si mavis dæmones, provocentur ut similibus vaticiniis se Deos esse demonstrent Jes. 41, 21. 23. Jure itaque merito Prophetias operibus annumerare posse mihi videor, quæ nemo facit nisi cum ipso Deus sit.

§. 8. Ab operibus quæ a perfectissimo intellectu tantum proficisci queunt, ad ea progredior quæ non nisi a voluntate omnipotente originẽ ducere in confesso est. Neq; hic omnia persequi animus est, cum multa faciat Deus mirabilia & in cœlis & in terra; tantum ea adducam quæ Deo soli tribuenda ipsa docet ratio. Primum astrorum motum solius Dei subesse imperio, eumque a nullo dæmone sufflaminari posse nemo sanus negabit. Ordinem cernimus motus corporum cœlestium, quo omnia hæc sublunaria reguntur ac conservantur, sine quo cuncta peritura essent. An vero hæc corpora Deum dæmonum arbitrio subjecisse iisque imperii sui habenas concessisse nobis patiemur persuaderi, a quorum directione omnes fere corporum terrestrium affectiones dependent. Dudum explosa sunt deliria, quæ astris suas assignabant intelligentias, quibus ut corpora animata moverentur, quæ ex Philosophorum paganorum commentis stolidi quoque Judæorum magistri adoptaverant. Aliud sane a suis prophetis edoceri potuissent, cum ipse Deus, miranda providentiæ suæ Jobo pandens, stellarum cursum a se solo dirigi pronunciet Jobi 38, 31. 32. 33. imo hunc ordinem ad confirmandas fœderis immutabiles promissiones contemplandum proponat Jerem. 31, 35. 36. (quod sacramenti vicem habuisse non sine ratione conjicit Cl. Lampius affinis mihi longe carissimus libro vernaculo de fœdere gratiæ part. 2. Cap. 23. §. 6. 7.) quin etiam in eo divinitatem suam agnosci jubeat Jes. 40, 26. Ac licet sagas dæmonum opera tempestates ciere, vetulis ac qui anilibus delectantur fabulis persuasum habeatur, mihi tamen religio est, hæc meteora alii præterquam Deo subicere, cum ipse in iis suam admirari jubeat potentiam Job. 5, 8. 9. & 38, 22. 30.

§. 8 b. Orbium cœlestium ac tempestatum moderamen.



§. 9. c. o- §. 9. E superiori regione in terram descendimus, & sicut naturæ  
*omnia ea* leges in aëres locis nemo coërcere potest, nisi moderator orbis, ita  
*quæ crea-* nec in terra quidquam præter naturæ motuumque leges fit, nisi  
*tioni aequi-* Dei omnipotentis operatione. E multis pauca proponere exempla  
*pollent,* & sufficiet. Cæco a nativitate oculos aperire, nunquam exauditum a  
*quibus na-* temporibus seculi, non nisi Deum posse, & cui id concedere velit,  
*tura su-* recte colligebat is, quem insigni hoc beneficio beaverat servator Joh.  
*spendun-* 9, 30. 32. nec dæmonium istud præstare potuisse fatentur Judæi  
*tur leges.* Joh. 10, 21. Senio confectum generare, decrepitam parere, compa-  
ratur creationi ex nihilo Rom 4. 17. & seqq. quam supra Deo soli  
competere indicavimus, nec quisquam, ut spero, repugnabit. Vir-  
ginem parere non tantum mirum Aguri visum, ut multi interpre-  
tantur dictum Prov. 30, 18. 19. sed & ut signum ex alto & pro-  
fundo a Propheta propositum Achazo Jes. 7, 11. 14. imo & creatio-  
ni comparatur Jer. 31, 22. Mortuos in vitam revocare, si præter  
Deum & creatura possit, non tam sæpe istud soli Dei virtuti tri-  
bueretur, cum eadem virtus requiratur in resuscitatione quæ in crea-  
tione. 1. Sam. 2, 6. Rom 4. 17. & alibi. Ex his exemplis conclu-  
dere licet, qualia sint illa opera, quæ nulla creatura sine numine per-  
petrare possit, quæ secundum solas naturæ leges operatur neque eas  
mutare ullo modo valet.

§. 10. §. 10. Si quis tamen accuratorem distinctionem omnium ope-  
*Quæ ta-* rum istorum requirat, quæ solius Dei ope extraordinaria fiant, ab iis  
*men certis* quæ creaturæ homine potentiores producere possint; lubens fateor id  
*expinguis* omnino esse arduum. Quamquam enim creaturam nihil nisi se-  
*ab opera-* cundum naturæ leges operari certum sit, nec supra eas effectum for-  
*tionibus* tiri queat finita voluntas, oppido tamen difficile est accurate deter-  
*naturali-* minare, an in operibus his illisve media naturalia sint adhibita secun-  
*bus distin-* dum naturæ motusve leges a Deo præscriptas & facultates creatu-  
*guere diffi-* ris concessas, an vero extraordinaria accesserit Dei potentia, quæ  
*cile est,* naturæ leges suspenderit. Quæ ambiguitas tantum abest, ut me a  
sententia dimoveat, ut ea potius solvendis plurimis difficultatibus,  
quæ contra eam afferri possunt, mihi sit inservitura. Integrum ta-  
men mihi erit, ea quæ vi naturali creaturarum secundum naturæ  
leges, licet modo nobis ignoto, fiant, ab iis extraordinariis operatio-  
nibus distinguere, ad quæ virtus divina requiritur. Hæc sola mi-  
racula



racula vocanda esse puto, illa non item. Et solent ita Theologi inter *miracula* & *mira* distinguere.

§. 11. Posse autem Deum O.M. certis temporibus pro sua & §. 11. *Mi-  
sapientia* & potentia sine se digno leges naturæ coërcere, atque ex-  
tra ordinem stupenda talia opera elicere, nemo negabit, qui Deum *racula fa-  
cere Deum*  
esse confitebitur. Neque ens simplicissimum simul ac sapientissi-  
mum leges semel latas haud revocare, causari licebit; nisi etiam *non dede-  
cet.*  
simplicitati ejus varias quibus hic mundus subest mutationes obesse,  
cavillari velimus; aut sapientiam non decere talia opera, quæ maxi-  
me, si ulla alia, infinitam potentiam, qua nutu omnia quæ vult effi-  
cit, demonstrant. Quamvis enim cuncta ipsius opera divinitatem e-  
jus ac robur deprædicent; non dubitandum tamen est quin & mor-  
taliū animos divinæ gloriæ incuriosos, veræque felicitatis suæ se-  
curos extraordinariis operationibus ad attentionem excitare, eorum-  
que incredulitatem expugnare possit; imo hoc rerum humanarum  
statu, id bonitatem ejus quam maxime deceat.

§. 12. Quotiescunque autem Deus ejusmodi opera extraordi- §. 12. *Sem-  
naria facit, ea fieri sine summo numine digno, nemo ambigit. Is si-  
per ea fa-  
nis vero cum in genere sit Dei gloria; tum in specie ad demonstnan-  
cit sine se  
dam illam gloriam faciunt, quam in opere gratiæ per Jesum Chri-  
digno.  
stum patefecit. Hinc non tantum de miraculis Moſis dicitur, quod  
ea facta sint ut cognoscerent Jehovah Deum esse & neminem præter  
ipsum Deut. 4, 32--35. sed & de prodigiis Christi, quod per ea ma-  
nifestaverit gloriam Joh. 3, 11. imo quod scripto consignata sint, ut  
credamus Jesum esse Christum filium Dei Joh. 20, 30. 31. Quod  
vero consilio gratiæ subserviant, vel inde evidens est, quod in iis ty-  
pum esse voluerit divina sapientia istarum Dei operationum, qua a-  
nimos nostros ex servitute diaboli liberatos regenerat, vivificat &  
donorum gratiæ facit compotes. Quæ causa est, cur Christus non-  
nunquam post peracta insignia opera, eorum occasione animos spe-  
ctatorum ad meditanda multo majora gratiæ opera evexerit, quemad-  
modum id capite Joh. 6. clare perspicui potest; Imo & ipsa vaticinia  
laudat eaque ad sanationes peractas applicat Matthæus, 8, 17. quæ  
non nisi de morbis spiritualibus agere patet; ut nisi de industria A-  
postolum mentem Prophetæ pervertisse dicere velimus, fatendum sit,  
in iis voluisse demonstrare typum sanationis animarum: quæ latius*



alii persecuti sunt. Nec prætereunda est sapientissima, quæ in operandis miraculis conspecta est harmonia, qua Deus pulcre omnia facit in tempore suo. Quæ harmonia non tantum in eo elucet, quod iis præcipue (b) temporibus edita sint miracula, quibus clarius consilium gratiæ per Prophetas manifestari voluit Deus: sed & quod infidelibus data sint in signa 1 Cor. XIV. 22. (c) Hinc temporibus potissimum ignorantia ac impietatis ad expugnandam hominum infidelitatem atque animos eorum excitandos ad attentionem, his remediis Deum esse usum constat. Neque adeo Ecclesiam perpetuo miraculis indigere multi e Patribus agnovere inter alios Chrysostomus homilia 2. in Pentecost. Opp. Tom. V. Et notum est illud πολυ-  
*Σπουδαν* Augustini, eum qui universis credentibus miraculum poscat, ipsum portenti loco esse. Imo & Magistratus Christiani, si quibusdam credimus, in locum miraculorum succedere, (d) eorumque vices subeunt, quos lepide perstringit Benjamin Hoadleyus doctissimus apud Britannos Præsul cujus verba ex *Answer to the representation of the Committee*, cum liber iste a paucis in nostra Germania legatur, in Romanum sermonem transfusa huc apponere haud pigebit. Nonnulli asseruere Magistratum civilem, respectu Ecclesiæ Christianæ, miraculorum loco habendum esse; siqui-

(b) Dico præcipue. Neque enim iis assentior, qui nulla miracula facta esse contendunt, nisi iis temporibus, quibus pars aliqua Verbi divini scriptis consignari debuerit. Neque enim Gedeonis vel Manoæ aut Simonis vel Eliæ aut Elisæ temporibus ulla sacri codicis volumina esse edita, vel minima veri specie asseri putem.

(c) Illic enim per linguas, donum miraculosum variis loquendi linguis intelligi communis est interpretum sententia; neque cum aliquibus de inconditis ecstatorum vocibus cogitandum esse, docet vers. 27. Nec assentior Cl. Werenfelsio, qui inter infideles non fieri miracula inde conjicit, quod Christus in urbe Nazareth miracula patrare non potuerit, unde porro putat, Christum prius ab iis in quibus miracula patrare voluerit exegisse ut crederent potentiam suam, quæ tamen per miracula fuerat demonstranda. Neque enim fides quam exegit fuit illa, ut crederent ipsum posse miracula patrare, sed ut crederent in Deum. Joh. 7. 17. Neque ab omnibus hanc fidem exegit: non saltem a plebe, quam paucis panibus satiabat quod ipsis discipulis ante impossibile visum Joh. 6.

(d) Quos nollem imprudenter sequi Cl. Werenfelsium l. c. p. 184. Olim miracula requisita dicens, quia status miser & contemptibilis Christianorum id poscebat, at hodiernus Christianorum status, quantitas & qualitas eorum non minus Infidelium animos percellere potest quam miracula.



*siquidem Christus primum miracula ordinaverit ; iis vero cessantibus, naturali ac ineluctabili modo consequi, Magistratus qui iis temporibus Christiani facti fuerant, curam Ecclesiae ac patrocinium in se suscipere debere. Fateor hæc mihi nova admodum, ast haud satis firma videri. Primo enim isthæc eo nituntur fundamento, publica, in oculos incurrentia atque indubitata communiter fuisse in Ecclesia miracula, donec Constantinus apparuerit, ut istorum subiret locum ; quod, vereor, demonstratu difficile nedum impossibile erit. Deinde iidem supponunt, Magistratum civilem munus miraculorum exsequi, i. e. eandem rem protegere ac promovere, quam miracula faciebant. Jam vero miracula divina missionis Servatoris nostri a Deo erant argumentum, aut alios a Christo missos demonstrabant, omniaque eo tendebant ut probarent ipsum revera eum esse, quem se ajebat, Messiam a Deo missum in mundum : Cum officium Magistratus in protegenda Ecclesia longæ alius sit indolis, & ad alium longe finem tendat, neque hætenus aliud fuerit, quam protectio alicujus specialis Christianorum sectæ, vel specialis cujusdam externæ professionis atque formæ cultus externi Christianorum, exclusis reliquis : quem scopum nunquam Deus mirando aliquo opere intendit. Nunquam miraculum factum legimus, ad stabiliendum Presbyterium, idque Episcopatui præferendum, aut ad preces publicas formalis adstrictas evehendas supra preces publicas formulis haud adstrictas, aut contra, vel ad statuminandam fidei confessionem aliquam præ alia dissentientium inter se Christianorum. Verum simulatque Magistratus, ut isti loquuntur, miraculorum munus exsequi cæpit, confestim audimus Orthodoxos persequentes Arianos imperante hoc Cesare, & Arianos turbantes Orthodoxos imperante alio, pro diverso imperantium affectu. Sique ad posteriora descendimus secula, quamlibet singularem cultus & disciplinæ formam ( non miraculis, Deo sint gratiæ, utpote quæ nunquam finibus inter se oppositis sunt edita, sed ) gladio civili Magistratuum defensam atque protectam invenimus, qui vel alterutram amplectuntur, vel suis commodis temporalibus hanc præ alia opportuniorem fore arbitrantur. Quam vere autem hæc methodus in locum miraculorum succedat, ego quidem perspicere nequeo : nisi contrarias plane partes agat, atque effectus plane oppositos iis habeat, quos miracula produxerunt ; idque adeo, ut jam multo magis miracula videantur requiri, ob id, quod ab iis in orbe Christiano factum est atque etiamnum geritur, qui in miraculorum succesfisse locum dicuntur, imo, ut vereor, hæc vehementer augeri debeant, ipsisque imaginariis successoribus suis succedere ea oporteat, antequam, quæ isti, veræ religioni intulere mala atque inflixere vulnera, probe sanari possint. Sed hæc obiter. Nos contemplata miraculorum natura ac scopo, ad ipsum *νεγινόμενον* examinandum accingimur.*



§. 13. *Solus Deus miracula vera patrat.*

§ 13. Miraculum cum definivimus opus quo leges naturæ suspenduntur, quodque nemo facere possit nisi sit cum illo Deus; in ipsa hac definitione jam docuimus, neminem præter Deum ordinarias naturæ leges posse suspendere. Atque id nunc porro ex ipsa creatoris rerumque creaturarum natura, sacrarum denique literarum testimoniis probandum nobis est. Creatorem ipsum si consideremus, qui omnibus creaturis & existentiam & essentiam dedit ac conservat, ac quamlibet suis circumscripsit finibus, ut in iis suam demonstret gloriam; siquidem creatura leges istas mutare aut transgredi posset, omnes sane Dei O. M. virtutes vacillarent. Omniscientia divina non sine errore ac metu deceptionis foret, siquidem fundamentum divinæ omniscientiæ dependentiam creaturæ ab opifice suo homo vel angelus subvertere posset. Summa ejus potentia infirmaretur, nisi suis arctata esset creatura limitibus. Sapientia eluderetur, si leges creatoris sapientissimæ, creaturæ subessent arbitrio. Nec bonitas ejus effectum fortiretur, si alius præter Deum, naturæ teneret habenas. Creaturam quoque dum nominamus, finitam dicimus substantiam, quæ suos a creatore habet præscriptos limites, ordinem, leges, quæ nisi creatoris arbitrio immutari nequeant. Id ipsa quoque Scriptura clamat toties ingeminans Deum *solum* וְלֹא־אֵלֹהִים facere miracula. Vide sodes Ps. 72, 18. 86, 10. 136, 4. & judica, annon ipsum Deum mendacem appellent, qui alii prætereum virtutem miracula patrandi tribuunt? Cumque ex miraculis se Deum velit agnoscere Deut. 4. 32-35. Ps. 86, 10. annon ipsum robor argumenti Deus infringeret, siquidem Sathanæ aut angeli eandem haberent facultatem, eaque injussu Dei patrare possent?

§. 14. *Quamvis in iis patrandis creaturis ut instrumentis utatur.*

§. 14. Verum cum illud extra omnem dubitationis aleam sit positum, negari tamen nequit, Deum per creaturas sapientissime suam demonstrare omnipotentiam. Liberum enim est summo omnium rerum Domino in perficiendis magnalibus suis, instrumentis, quibus vult, uti. Cumque malæ simul atque bonæ creaturæ imperio ejus subsint, non dubitandum esse videtur, posse Deum etiam malis angelis aut impiis uti hominibus, ad fines sibi propositos. Neque hæc ego abnuerim. Quod si ergo per creaturas portenta talia quæ vere נִפְלְאוֹת dici queant producantur, istorum origo omnino ei adscribenda, qui nutui suo omnia inservire cogit; neque ergo iis, qui hujusmodi



jusmodi vel ab angelis vel hominibus perfici vident, in causis secundis subsistendum est, sed ad primam causam ascendendum, Deum nempe, qui vires suas in creaturis exserit.

§. 15. Nun-

§. 15. Sed quotiescunque per res creatas talia produci jubet Deus opera, id finibus sua virtute ac gloria dignis fieri omnino fatendum est, quos jam verbo supra indicavimus: ad gloriæ nimirum suæ demonstrationem, verbi Evangelici confirmationem, infidelium ac pertinacium convictionem. Hinc e contrario liquet, minime credendum esse, Deum eandem facultatem extraordinariam creaturis concessurum esse, ad homines seducendos in errorem, a Dei cultu avertendos, aut in pertinacia sua confirmandos. Putabimusne Dei decere sapientiam, ut virtutem suam extraordinariam eum in finem det conspiciendam, qui gloriæ ejus adversetur? Hoc sine sanctitatis est qua gloriam demonstrat, ut ea patret opera, quibus gloria ejus abnegetur? Hæc sine bonitati ejus conveniunt, ut de industria talibus miraculis hominem fallere ac pervertere studeat, cujus tamen salutem exoptat? Porro an Deus sibi ipsi contrariabitur? aut secum ipse pugnabit? Aut regnum suum sciens volensque destruet? De Satanæ regno ita olim argumentabatur Christus: *Omne regnum in se divisum vastatur, & omnis civitas domusve in se divisa non consistet, & si Satanas Satanam ejicit, in sua sevit viscera, nec regnum ejus consistet*, Matth. XII. 25. 26. Talem stultitiam nec Satanæ tribui vult Servator noster. Quid ergo? Nos Deo ipsam tribuemus? Absit blasphemia superstitio. Non operabitur Deus miracula quæ regnum Christi destruant, nec suam commodabit Satanæ omnipotentiam ad perdendum Christi regnum. Quo denique jure ii punientur, qui his miraculis seducti mendaciis fidem habuere? Nonne objicere poterunt tremendo judici, ipsum talia stupenda patrassè opera, ut non potuerint non persuaderi, hæc a Deo esse speciali jussu profecta. Quisquis hæc sine præjudiciis, sedata mente perpenderit, mecum confitebitur, non posse Deum naturæ motusque leges suspendere, ut ad mendacia attentos reddat homines, eosque Satanæ mancipet. Foret hæc insuperabilis tentatio, cui vir probus & rationalis merito succumberet. Adeoque Absit ut credamus, Deum ita tentare homines, qui neminem se tentare ait Jacob. I. 13. (e)

SECT.

(e) Cum his conferat Lector, quæ habet Cl. Werenfelsius pag. 188. 189. l. 1



## SECTIO II.

### *Objectiones refellens.*

#### §. I.

§. I. *Re-  
felluntur  
objecta.*

**D**emonstratum est in superioribus, nunquam Deum hac fini angelis vel hominibus concedere posse miracula patrandi facultatem, ut per ea in errore obfirmantur homines, regnumque adeo Christi destruat. Sed multa sunt quæ huic veritati fucum obducere possunt, quæque in causa fuerunt, ut viri doctissimi ac piissimi hanc veritatem deseruerint, non superstitione quidem, sed submissa sacrorum oraculorum veneratione (in quibus causæ suæ putarunt esse præsidium) inducti. Non inutilis itaque erit opera, si, quæ ex ratione vel sacris assertioni nostræ opponi possunt dubia, diluamus. Quæcunque autem objiciuntur, iis demonstrare nituntur: vel *posse* Deum per Satanam atque impios miracula facere ad homines tentandos, vel *revera* nonnunquam inter infideles talia *fecisse*. Prius ex ratione & Scripturæ dictatis: Alterum exemplis confirmare nituntur. Pellendæ itaque sunt hæ nebulæ, ne amplius veritatis nobis eripiant radios.

§. 2. *I.*

**§. 2.** Posse Deum per Satanam ejusque instrumenta ad tentandum populum infidelem supernaturalia quædam efficere opera, ex ea ratione nonnulli sibi persuadent: quod malis creaturis, cum peccant aut alios pervertunt, Deus vitam ac vires conservet, suoque con-  
*um per ve-* *ra mira-* *cula ten-* *tare, ne-* *gatur.* *cursu*, ut loquuntur in Scholis, ipsos sustentet: Quoniam vero ad conservationem eadem virtus requiritur, quæ ad creationem aut productionem e nihilo; non indignum esse Deo putant, si ad infideles tentandos miracula fieri sinat, quæ creationi æquipollent. Sic argumentatur Coccejus loco supra descripto. Dum non putat Deo indignius ut tentet per proprium opus quam per opus creaturæ, non magis quam Deus non indecore hominem faciat ex occasione scortationis, aut permittat elementa moveri ad nutum diaboli sævientis. Miror virum tam perspicacis ingenii hic adeo in tenebris micare. Conservationem eadem virtute fieri qua res primum creatæ sunt, largior; qui enim effecit ut  
res ex



res ex nihilo factæ sint, facit etiam ut porro sint, quod si facere desineret in nihilum omnia reverterentur. Sed & apud omnes Theologos in confesso est, esse aliquid inter creationem ac conservationem discriminis, posseque Deum creaturam in aliquo statu conservare, ac ut porro sit efficere; in quo tamen eam creare Deo indignum fuisset. Sic experientia edocemur, conservare Deum homines & angelos rebelles, & ordinaria potentia sua ad eorum actiones etiam pravas concurrere; sed Deum ipsos in eodem statu creasse, nefas fuisset, cum hoc pacto auctor peccati extitisset. Cum itaque in miraculis non tantum per leges naturæ ordinarias creaturæ conserventur in operando; sed speciali jussu Dei leges naturæ suspendantur; alia certe debet esse operatio Dei in patrandis miraculis, quæ cum ordinario concursu comparari minime potest. Licet itaque Deum non dedeceat libidinosum conservare, ac permittere ut ex furtivo amore secundum naturæ leges ordinarias fiat homo; non tamen inde sequitur, ipsum eodem modo extraordinariam virtutem suam posse Satanæ vel impiis concedere, ut producat opus quod naturæ motusque leges superet & mortales in errorem ducat; Hæc enim toto cœlo differunt. cum scortatore concurrat secundum leges ordinarias: In impostoris vero gratiam naturæ leges suspenderet: Scorti fœtus neminem in admirationem rapit, nec divini quid ei inesse quisquam suspicatur: Ast impostoris miraculum Deum præsentem argueret omnesque merito in stuporem raperet. Quæ de Diabolo addit, cui permittat Deus ad nutum ejus elementa movere, si de tempestatibus in aëre excitatis intelligat, ipse sibi contradicit, cum *potestatem aëris* quæ Satanæ ut *principi* Eph. 2, 2. tribuitur ipse *metaphorice* per *potestatem tenebrarum*, & *ignorantiæ ac impietatis nebulas* in suis ad h. l. commentariis interpretetur. Cumque hic unicus sit in tota Scriptura locus, qui male intellectus, vulgus in ea confirmavit opinione, qua Sagæ ope Satanæ tonitrua fulgura imbresve concitare creduntur, non video unde hæc adstrui possint nisi Platonis regulam recipiamus *περι δε των δαιμονων ειπειν και γινωαι την γενειν, μειζον η καθ' ημας, πισειν δε τοις ειρηκοσιν εμπροθεν*. Nam quod de Beldia dicitur, quod faciat ignem de cœlo in terram decidere, id metaphorice interpretandum esse idem Coccejus docet. Apoc. XIII, 13. Sin vero per *motum elementorum* corpora ista intelligat, quæ secundum



cundum naturæ leges movere possit Satanas, non repugno : Sed eodem modo quo supra respondeo : a concursu ordinario male concludi ad concursum extraordinarium, qualem in miraculis supponunt Theologi omnes.

§. 3. II. §. 3. Porro non incredibile esse, Deum ad tentandum populum suum, Satanæ ejusque prophetis permittere, ut mendacia sua miraculis robovent, ex eo probare satagunt, quod sæpius id in sacris prædicat Deum dicatur, populusque Dei ne iis fidem habeat moneatur. Primum in velle Deut. omnium ore est Dei monitum quod legitur Deut. XIII. 1. & seqq. 13, 1. &c. Ubi jubentur Israëlita sibi cavere a Vatibus vel somniatoribus qui daturi sint signum vel prodigium, ut persuadeant iis Deos alienos colere, & tale prodigium vel signum venire posse Deo tentante. Judæi frequenter hunc locum Christianis objiciunt. Jesum nostrum ἐπι παντα εὐλογητόν hujusmodi Pseudoprophetis blaspheme annumerant; miracula ejus cum negare nequeant, eadem hac specie eludunt; summo etiam jure ipsum a Synedrio neci datum ex eodem loco contendunt. Nos Christiani vulgo respondemus: Jesum nunquam docuisse Deos alienos sequi; cum se Deum dixerit, ejus divinitati Mosen etiam ac Prophetas testimonium perhibere. Recte quidem. Sed vereor ne nimium illis concedatur, atque hac ratione miracula Christi reddantur inutilia, si pseudoprophetas eadem imitari potuisse largiamur. Mihi alia longe stat sententia, neque hunc moniti divini sensum esse mihi persuaderi patior. sed venturum tamen aliquando signum & prodigium a pseudopropheta datum dices? Fateor. Verum an Deum O. M. pseudoprophetæ cooperaturum additur? Minime gentium. Venturum tantum nonnunquam prædicatur. Neque istorum signorum aut prodigiorum ratio exprimitur, fictane an vera futura sint. Ficta vero hic intelligere quid vetat? Tanto pronius hoc conjicitur, quod de נבואות hic nulla mentio, quæ Deum facere לברר solum, alibi Scriptura clamat. Objicies: Si de fictis miraculis sermo est, cur ea non additur cautio? cur non κριτηρια potius memorantur quibus ficta a veris discernere liceat? Uti argumentatur Clericus ad h. l. scribens: *Verum miraculum fuisse statuitur, alioqui Moses potius discrimen verorum & falsorum miraculorum descripsisset, ut ita veri Prophetæ a falsis secernerentur.* Sed in promptu est ratio. Cautionem hanc addere non opus erat, cum veris miraculis Deum tanquam



tanquam sibi proprio *αυχνηματι* demonstrari supra jam edocti erant Deut. 4, 32. - 35. *κρηνηρια* falsorum miraculorum examinanda proponere res fuisset ardua, ad cuius examen cuiusvis nec facultas nec ingenium fuisset. Nihil itaque facilius erat, quam doctrinam unius veri Dei retinendam suadere, cum certi esse possint, qui ab ea recedant, a Deo non esse missos; eorumque signa non a Deo sed alia causa sibi licet ignota procedere. Hinc probare non miracula jubentur (quod magni operis est, profundamque rerum naturalium scientiam requirit, ut supra docuimus) sed Spiritus an ex Deo sint. Unde nec in N. T. alia *διακρισεως πνευματων* datur norma 1. Joh. IV. 1. 2. 3. Nihil itaque in hoc loco veris pseudoprophetarum miraculis est patrocinii. Qui pro vulgari militant sententia, vi veritatis adacti id nobiscum quandoque fatentur. Excidit inter alios & *Knibbenio* hæc confessio, quamvis alibi tritam sequatur viam, dum in historia Prophetarum belgico idiomate conscripta Lib. III. Cap. 5. §. 7. n. 6. nihil aliud ex hoc loco colligit, quam Pseudopphetas vel veneficiis vel præstigiis talia patrare quæ miracula esse vulgo creduntur, **vermeinte Wunderwerck** ut habet vernacula versio. Atque in hunc sensum etiam illud exponit *Vincentius Lirin. Commonit. Magnus profecto nescio quis significatur magister & tantæ scientiæ, qui sectatoribus propriis non solum quæ humana sunt nosse, verum etiam quæ supra hominem sunt prænoscere posse* (NB.) videatur.

§. 4. Aliud vero huic sententiæ quæritur præsidium in verbis §. 4. *Nec Christi Matth. VII. 22. ubi extremo die quidam prodituri dicuntur Matth. 7, Domino objicientes quod in nomine ejus δαιμονια εξεβαλον & δυνα- 22. μεις πολλας εποισαν*: quibus tamen profesurus sit *ο δε ποτε εγνων υμας. αποχωρειτε απ' εμας οι εργαζομενοι την ανομιαν*. Nescio an ex hoc loco sibi persvaserit Coccejus, quod in Pot. Script. VII, 52. asserit, *Christum per quoscunque nominatum posse facere miracula*: quod parum abest a Judæorum superstitione, qui nomen *ανεκφωνητον* a quocunque nominatum mira patrare nugantur. Verum in hoc dicto Christi, quod probe notandū, nullus est sermo de Satanæ ministris qui alios a Christo abalienare conentur, sed de iis qui Christum compellent *κυριε κυριε v. 22. tribuitur enim his quod & δαιμονια εξεβαλον*: jam vero Satanas Satanam non pellit, docente Christo Matt. XII. Nihil hic docetur, nisi quosdam Christum profitentes quamvis nec in fide salutari radi-



dicati, nec regeniti sint, tamen ipso cooperante miracula patratu-  
 idque in nomine Christi, quod fide eâ invocaturi sint, qua credant ipsum  
 esse Messiam Dei filium, cui data sit omnis potestas in cœlo & in terra:  
 nec eos Christo adversos fuisse, sed regno ejus propagando inservi-  
 isse ex Marc. IX. 38. 39. 40. tuto colligitur: ubi cum discipuli JESU  
 conquererentur de quodam ejiciente dæmonia in nomine ejus, qui ta-  
 men ipsum non sequeretur, responsum tulerunt: Ne impeditis ipsum:  
 Nemo enim virtutem faciens in nomine meo *δυνήσεται ταχὺ κακολο-  
 γησαί με*, qui enim non est contra nos, is pro nobis est. Neque id  
 Deum dedecet *προσκαίροις* etiam ad promovendos regni sui fines uti  
 (f) Neque inde sequitur, Christum a quovis nominatum posse mi-  
 racula facere. Imo nolle ipsum per præstigiatores miracula facere  
 licet nominatum, illustri exemplo filiorum Scevæ Pontificis doce-  
 mur, Act. XIX. 13--17. qui licet hoc carmine uterentur *ὀρκιζόμεν  
 ὑμᾶς τὸν Ἰησοῦν ὃν ὁ Παῦλος κηρύσσει*, haud impune tamen hanc tule-  
 runt audaciam.

§. 5. Nec  
 Matth. 25  
 24.

§. 5. Porro in causam suam advocant vaticinia de Pseudo-  
 prophetarum miraculis; Christus enim eos daturos *σημεῖα μεγάλα  
 καὶ τεράτεια ὥστε πλανησαί ἐν δυνάμει καὶ τῆς ἐκλεκτῆς* monet Matth.  
 XXIV. 24. Et majora etiam dicuntur de bestia Apoc. XIII. 13. *ποιεῖ  
 σημεῖα μεγάλα, ἵνα καὶ πῦρ ποιῇ καβαλᾶν ἐκ τῆς θρᾶνθ ἐπὶ τὴν γῆν*  
 &c. Miror Coccejum, qui prius membrum veri nominis miracula  
 interpretatur, posterius improprie intelligi velle. Siquidem verum  
 est, quod in potentia Scripturæ pronuntiat, *ad Diaboli servientis nutum  
 elementa moveri*, quidni ignem ex aere in terram demitteret? sed ve-  
 tulis relinquamus has nœnias. Paulus qualia futura sint hæc ση-  
 μεῖα aperte declarat, cum hæc vocet *δυνάμει, σημεῖα & τεράτεια ψευ-  
 δος* i. e. *mendacii*, iisque jungat *απάτην τῆς ἀδικίας* i. e. *fraudes injustitiæ*.  
 Novi Coccejum etiam hæc *τεράτεια ψευδος* interpretari signa in erro-  
 rem ducentia & mendacium confirmantia, atque in Commentario  
 ad 2. Thess. II. 9--12. multis eandem adstruere sententiam quam in  
 potentia Scripturæ defendere conatur: quæ partim supra jam refu-  
 tata sunt: partim in sequentibus discutientur. Id tamen monendus  
 est lector, non negare ipsum, ambiguum esse istius phræseos signifi-  
 catio-

(f) Uti nec Deum dedecet eximiis donis ornare Ministros Ecclesiæ, qui cum aliis præ-  
 dicant ipsi sunt *αδοκιμοί* ut ait Cl. Werenfelsius.



cationem, & posse omnino verti: *miracula ficta, imposturas*: quod Græcæ quoque constructioni convenientius est, ut Genitivus substantivi pro adjectivo qualitatis ponatur, sitque *signum mendacii* idem quod *signum mendax* vel ementitum. Cum autem aliam jungat explicationem, qua per miracula *ψευδης*, vera miracula mendacium comitantia intelligantur, Chrysostomum appellat, qui id profecto ne vel per somnium cogitavit. Scribit equidem *ητοι διεψευσμενα, η ει ψευδ@ αγον@α* i.e. vel ementita, vel in mendacium inducentia, uti per adversativam particulam vertit Coccejus. Verum alia longe Chrysostomo mens fuit, ut præcedentia arguunt, ubi hæc verba ita interpretatur *τ@εσι πασαν επιδειξ@αι δυναμιν, αλλ' εδεν αληθες, αλλα προς απα@ην τα παν@α*. Et postea de AntiChristo dicit *απο σημειων μονων ψευδων πιστευ@αι*. Unde fictitia fore hæc miracula credidisse Chrysostomum liquet, quæ simul in errorem essent inductura. Nec impedit quo minus imposturæ putentur, quæ tamen *magna* fore prædicit Spiritus S. cum & ea quæ astu hominum ac dolis perpetrantur opera, in stuporem ignaros rapere possint; magna sunt in oculis hominum, qui abditas istorum prodigiorum causas semper penetrare nequeunt.

§. 6. Pergimus ad exempla, quibus Satanam vel Pseudoprophetas vera miracula fecisse probare nituntur hujus sententiæ patroni. Si Coccejo credimus, Diabolo hic primæ debentur partes, ita enim ad 2. Theff. II. § 89. infit: *Primum miraculum fuit serpens loquens. exemplis* Haud pauci sunt, qui totam hanc narrationem parabolicam credunt, (cum & ipsi, qui literam sequuntur, ab ea tamen in hac historia recedere in multis circumstantiis cogantur) neque Satanæ id tribui volunt, quod Deo adscribitur, *Jehova aperiebat Asinæ Bileami os* Num. XXII. 28. Neque eos hæreseos postulaverim, modo ne Satanam auctorem seductionis inficientur, quod alibi sacræ literæ aperte docent. Verum stet vulgaris sententia, Diabolum serpente tanquam instrumento fuisse usum ad pronuntianda quædam verba: quousque organa quorundam anguium a spiritu aliquo naturaliter moveri possint, ignoratur; neque id continuo supernaturali alicui virtuti tribuet qui sapit, cum & psittaci & cornices voces quasdam proferre ab hominibus edoceantur. Alioqui Deum mutos & elingues sanare ubivis clamant sacræ literæ; & cum Satanus non potuerit cæco a-

§. 6. III.  
Neque id  
probat  
enim ad 2. Theff. II. § 89. infit: *Primum miraculum fuit serpens loquens. exemplis*  
(a) Serpentis loquentis.



perire oculos, ut supra ex Johanne probavimus, non crediderim etiam ipsum muto aperire os. Neque id pro vero miraculo habuisse video Cl. Lampium, cum nullius se veri miraculi a pseudoprophetis patrati meminisse ait, si miracula Ægyptiorum exceperis *Gnadenbund 3 Theil* pag. 421.

§. 7. b.  
*Nec Magorum in Ægypto.*

§. 7. Sed & hæc miracula magorum ulterius examen requirere, annon hæc fraude vel naturali arte patrata sint, judiciose addit. Instituiamus itaque examen eorum quæ Ægyptii Jannes & Jambres effecisse dicuntur, ut videamus an Deo vel Satanæ, vel arti humanæ, vel dolo tribuenda sint. Tria tantummodo in Ægypto patrasse mira in sacris leguntur magi (1) Posteaquam Aaron projecisset scipionem suum coram Pharaone & servis ejus, isque factus fuisset לַתַּנִּין; & Pharaon convocasset חַרְטָמִי מִצְרַיִם & חֲכָמִים, iidem חַרְטָמִי מִצְרַיִם etiam ita fecisse leguntur בַּלְטִיָּהָם : projecerunt quisque scipionem suum, & facti sunt dracones vel serpentes, sed scipio Aaronis consumsit scipiones ipsorum Exod. VII. 10. 11. 12. (2) Cum Aaron extenso scipione suo omnes Ægypti aquas in sanguinem convertisset, v. 19. 20. 21. de Magis additur v. 22. וַיַּעֲשׂוּ כֵן חַרְטָמִי מִצְרַיִם בַּלְטִיָּהָם (3.) Denique cum jussu Dei Aaron ingentem ranarum exercitum e fluvio stagnisque Ægypti eduxisset, Magi quoq; leguntur similia fecisse Exod. VIII. 3. vel 7. וַיַּעֲשׂוּ כֵן הַחַרְטָמִים בַּלְטִיָּהָם וַיַּעֲלֻ אוֹת הַצַּפְרָרִיעִים עַל אֶרֶץ מִצְרַיִם : Cum autem pediculos produxisset Aaron, eundem imitaturi præstigiatores eodem modo fecerunt בַּלְטִיָּהָם ut producerent pediculos, sed non potuere; unde dixerunt Pharaoni הִנֵּה אֱלֹהִים הוּא Hic est Dei digitus. Priora vero quæ effecere Magi, veri nominis fuisse miracula multi sibi persvadent. Quamquam hic neque Judæi nec Christiani sibi satis consent. Auctor *Nizzachon Veteris* revera hos effectus a Magis productos esse credidit, cum Blaspheme Jesu nostri miracula cum iis comparet pag. 34. & in *Sanhedrin* Magum definiunt הַמַּכְשֵׁף זֶה הָעוֹשֶׂה מַעֲשֵׂה וְלֹא הָאוֹחֵז הָעֵינִיָּם Magus is est qui efficit opus, non vero qui fascinat oculos. Et Bodinus in detestando de abditis rerum sublimium arcanis libro, Judæum ita argumentantem introducit: *Moses Ægyptiorum magos eadem fecisse scribit, quæ ipse divina potentia fecerat i. e. serpentes, ranas, sanguinem; at Moses fascinabat neminem, igitur nec illi, cum eadem ab ipsis facta fuisset scribat.* Quod iterum e codice



Sanhedrin confirmatur, ubi ad verba Exod. VIII. 19. ita ex versione Cl. Cocceji scribunt verbi: Dixit R. Eleasar. Hinc discimus non posse dæmonem creare creaturam minorem quam secundum mensuram grani hordeacei R. Papa: *ne instar cameli (formicæ) quidem condere potest. Sed majora corpora facile ipsi coguntur, non item minuta.* Ibidem distinguunt inter כלהטיה Exod. VII. 11. & בלטיה quod in seqq. Magis tribuitur. Hoc notare opus dæmonum, illud vero opus magiæ dicentes. Ab iis tamen recedit Aben Esra, qui observante Coccejo *retentionem oculorum* interpretatur. Christiani hic etiam in diversa abeunt, in quorum sententiis recensendis non est quod operam ludamus. Ego observari velim [1] Expresse distingui modum, quo Aaron & quo hi præstigiatores mira ista effecerint. Illi fatentibus ipsis magis *digitus Dei* adfuit; unde certo certius concludo, in eo quod magi effecerunt non fuisse digitum Dei, nullamque adeo supernaturalem virtutem. Hinc dicuntur id effecisse כלהטיה vel בלטיה sive id deducamus a לוט operire, obvolvere, ut notet artes reconditas, abdita arcana; sive להט flamma, fulgor, ut sit veluti fulgur & ignis prætervolans, ars quibus oculi celeritate quadam præstringuntur. Judæi certe Alexandrini has voces non [ut postea Thalmudici] distinxere, ubi vis enim vertunt per Φαρμακείας quamvis Aldina editio, sed Exod. VIII, 7. tantum, habeat επαοιδίαι incantationes, ut ferme crediderim το η in priori voce redundare. (2) Notari velim Magos tribus insigniri titulis, quorum prior חכמים sapientes, philosophos, magos notat, cujus vocabuli innocens olim significatio fuit; quamvis hos maxime nocentes fuisse haud abnuemur, cum præstigiis suis Pharaonem in pertinacia sua confirmare annisi sint. Dein מכשפים vocantur, cujus vocis significatio incerta quam maxime. Græci Φαρμακεις reddidere. Nescio an audiendi sint Judæi qui a כהש deducunt (in Sanhedrin, conf. & a Buxtorf in h. voc. laudatos) quasi *mendax reddant decretum superiorum*. Mendaces fuisse non abnuo, sed Dei decreta vel naturæ ordinem eos invertere, credat Judæus Apella non ego. Deniq; חרטמים audiunt quod per χρυσίδας commodissime exponi posse docet Guffetius ad חכר. Ex his saltem titulis colligitur, ipsos magiæ naturali deditos, nonnunquam & fraudibus, talia perpetrasse quibus oculi superstitiosorum fascinati, divini quid iis inesse suspicarentur. (3) Denique si ipsa quæ



sa quæ de iis narrat historia sacra, curatius pensitemus, non putem ea tanti fuisse momenti, ut ad ea specialis Dei concurrentis voluntas requisita fuerit. Projecerunt virgas ex quibus facti serpentes: fateor. Sed veram hanc fuisse μεταμορφωσιν non patior mihi persuaderi. Mecum partim sentit glossa in Bibliis Tossani: **Gleichwohl war dies der Unterscheid / daß der Stab Arons wahrhaftig durch die Krafft Gottes in eine Schlange verwandelt worden; aber was die Zauberer thaten war nur eine teuflische Verblendung.** Quid si dicamus ventilatores & ὑποπαικτες hodiernos eadem mira in foris publice patrare? Neque id philosophis aut Sacerdotibus indignum quis putet, cum notum sit quibus fraudibus pagani sacerdotes olim vulgus excæcaverint; ipsique Pontificii etiam nunc sæpissime his artibus credulam plebem ludant. Serpenti-  
bus præcipue ad suas præstigias & incantamenta fuisse usos quos illæsi tractabant, notissimum est. Dubitanti Bochartus plurima subministrabit exempla, in Hierozoico. Deinde & aquam in sanguinem convertere. Ubi iterum Glossa in Bibliis Tossani: **dem äußerlichen Schein nach wie droben v. 11.** Certe non leguntur id fecisse in tota Ægypto, sed tantum coram Pharaone, accepta vel ab Israëlitis aqua, vel ex fodinis quas Ægyptii necessitate compulsi noviter eruerant; nam per 7. continuos dies plaga hæc duraverat; neque post eam finitam demum id fecisse leguntur, verum immediate post editum a Mose & Aarone miraculum. Non majus itaque hoc fuisse prodigium crediderim, quam quod in sanguine S. Januarii stupente plebe ridentibus sanioribus & hæreticis Neapoli vilitur. Denique quod Ranas produxisse legantur, monet Bochartus Hieroz. Part. II. Lib. V. Cap. 2. *Sed neque magos certum est veras ranas produxisse. Eas enim aliunde allatas fortasse supposuerunt, aut prestigiis suis Pharaoni imposuerunt. Quanquam ex putri materia ranas producere non sit magna molis opus, cum quandoque ex genitali aqua, cœlesti calore condensata conformataque ranunculos etiam in nubibus excludi constet.* Quod autem in terram Ægypti eduxisse ranas legantur, id synecdochice intelligendum nemo negaverit, quisquis jam prius in totam terram ingentem ranarum copiam ab Aaroneeductam cogitaverit, quæ non nisi intercessionem Moïsis ac Aaronis removeri potuere. Neque quisquam Phrasin hanc כַּשְׂפֵּי נִימִי-  
mum urgebit; cum eâ tantum mihi innui videatur, magos exter-  
nos



nos illos actus Aaronis, extensionem brachii & scipionis imitatos fuisse; nam & cum de pediculis agitur, quos tamen producere nequiverere, eodem modo de iis dicitur עָשׂוּ כֵן Exod. VIII, 14. Quæ omnia, si probe advertantur, clare docebunt, non posse hoc magorum exemplo probari, pseudoprophetas vera unquam edidisse miracula.

§. 8. Hæc scripseram, cum incidi in Clericum magno nisu vera §. 8. *Quod* isthæc fuisse Ægyptiorum miracula contendentem: quod tanto magis *ab* Obje-  
miratus sum, cum alibi vera miracula a Deo præstita extenuare & *ctionibus*  
in censum rerum naturalium redigere sustinuerit. Præter ea quæ Clerici  
supra jam confutata sunt, urget præcipue (1) *Si tanta fuit inter mira- vindicatur*  
*cula hæc dissimilitudo, ut non minus differrent Ægyptiaca a Mosaicis quam*  
*Agyrtarum artes ab effectibus vere portentosis, mirum est Mosen ne verbulo qui-*  
*dem hoc indicasse; imo vero ita locutum ut contrarium plane sensisse videatur.*  
*Profecto multum ad gloriam Dei Israël adtinebat, obiter saltem monuisse legen-*  
*tes, Ægyptiorum Magorum miracula mera oculorum ludibria fuisse, nec quid-*  
*quam simile veris habuisse, præter speciem externam.* Verum non ita locu-  
tus est Moses, ut vera miracula ea credidisse videri possit. Non enim  
obiter sed data opera monuit legentes, in Ægyptiorum præstigiis  
non fuisse Dei digitum, adeoque ea nulla divina virtute patrata. Et si  
vocum מַכְשָׁפִים & חֲרָטְמִים verum significatum ita perspectum  
haberemus, uti quidem ii quibus Moses scripsit, ipsa hæc denomi-  
natio forte omnem adimeret nobis scrupulum. (2) Quæ ex Deut.  
XIII. 1. & Matth. XXIV, 24. affert, supra jam diluimus. Cum vero  
& eo nitatur, Christum Judeos blasphemantes, quod *ἐν ἀρχαῖς δαιμονίων* mi-  
racula faceret, non confutare, negando a Cacodemonibus miracula fieri posse,  
observare debuisset, argumenta talia a silentio desumpta non multum  
habere roboris; sed & etiamsi Christus negasset a Dæmone miracula  
fieri vera, quod maxime potuisset, id tamen altioris fuisset indaginis  
ut jam supra monui; adeoque ad absurdum ipsos deducere mavult:  
cum alioqui Scriptura sæpius Deum solum miracula facere doceat, ipsique  
Judæi, Dæmonem ne cæco quidem aperire posse oculos, fateantur. (3) Quod  
vero attonitus quærat: quis docuerit Physicos, Dæmonum nullam esse potenti-  
am, aut eam non excedere humanas vires, vel leges corporeis naturis ab initio  
positas? facile largior, Physicam nihil de dæmonum viribus quantæ  
sint docere; sed Judæos & nos Christianos id Scriptura docet, quæ  
D  
licet



licet Satanæ non determinet potentiam, id tamen aperte satis declarat, non posse ipsum talia patrare opera, quæ Deus libi soli tribuit, uti in superioribus demonstravimus. (4) *Sacram Historiam plurima portentosa a Cacodemonibus facta esse nos docere ait, unde concludit, non dubitandum esse quin ab iis miracula permittente Deo fieri possint.* Cum vero nullum exemplum adferat clarum atque indubitatum, a diabolis unquam verum miraculum ad tentandos homines proditum, tantisper huic argumento refutando supersedebimus donec id exemplis ex historia sacra fulciatur. (5) Porro Phrasin יַעֲשֶׂה לְךָ proprio sensu intelligendam credit. At ipse postea eandem Phrasin ad Exod. VIII, 18. ita interpretatur: *Hoc est: pulverem percusserunt, adhibueruntque arcana verba, ut idem facerent, verum non potuerunt. Itaque conferuntur hic magi Aaroni percussione pulveris, quæ si sola spectetur, sic ut Aaron fecerunt. Alii sic fecerunt interpretantur: sic facere conati sunt. Ac sane verba activa sæpe conatum duntaxat designant, ut Gen. 37, 21.* (6) Præterea etiam Phrasin יְהִי לְתִנִּינִים urget ad Exod. VIII, 12. & virgam Aaronis eorum virgas deglutiisse, unde formam istarum æque revera mutatam esse colligit atque virgæ Aaronis. Quod speciem habet aliquam. Verum nec insolens est sacris literis ita res describere uti vulgo videntur, maxime cum aliunde colligi possit, illa tantum secundum communem loquendi modum ita dici. Similium locutionum exempla sunt obvia, & ab iis proferuntur, qui scripturam, cum solem moveri ait, vulgarem loquendi modum imitari contendunt. Ego unicum in præsentia exemplum profero de productione Samuelis a Pythonissa, quem verum Samuelem fuisse nemo sanus dixerit; neque tamen id auctor librorum Samuelis monet, cum id tamen, Clerico iudice, maxime fieri debuisset, quippe multi inter Judæos & ipse Siracides hac narratione decepti verum Samuelem fuisse crediderunt. Sed de hac illusione postea pluribus dicendi locus erit. Id tantum de Clerico monebo, cum ad historiam Pythonissæ Endorienfis scribat: *Me quidem quod attinet, vix crediderim phantasma ullum fuisse; quia si Deus permisisset cacodemoni in gratiam fatidica mulieris, phantasmata prophetarum aut alia formare, quibus fallerentur homines & veris etiam prædictionibus allicerentur, ejusmodi vaticinationibus favere visus fuisset, nec facile fuisset veros Prophetas a falsis secernere; me vehementer mirari, cur non eodem modo de miraculis Ægyptiorum ratiocinetur.*



§. 9. Ne quidquam prætereamus, quod receptæ sententiæ pa- §. 9. c.  
trocinari possit, ad *Bileamum* vatem progredimur, qui licet nulla pa- *Nec Bileam*  
trasse miracula legatur, nonnulla tamen Deo inspirante edidit vatici- *mi vatis.*  
nia. Unde colligeret aliquis, si per impium Deus futura prædixit,  
idem per Satanam fieri posse, ac per utrosque miracula patrari, cum  
prophetiæ ac miracula pari passu ambulent, Impium enim fuisse  
atque idololaram alibi Scriptura aperte docet. Vid Num. XXXI,  
16. 2. Pet. II, 15. Jud. v. 11. Apoc. II, 14. quamvis aliquam veri  
Dei cognitionem habuisse non negaverim. Verum hoc exemplo  
thesis mea non impetitur. Neque enim his vaticiniis quenquam in  
errorem seduxisse legitur. Neque indecorum est Deo, cujus impe-  
rio omnes creaturæ subsunt, etiam impiis nonnunquam ad manife-  
standam gloriam suam uti. Quæ tanto clarius in hoc vaticinio e-  
luxit, quod Bileamum, qui Israëllem diris devoturus venerat, coëgit  
imprecationes suas in benedictiones commutare, unde & istud tan-  
quam exemplum insignis beneficentiæ Israëlitis proponitur Mich.  
VI, 5. Plura admirandæ hujus providentiæ in sacris reperiuntur  
exempla, qualia sunt somnium Pharaonis, Nebucadnezaris, ux-  
oris Pilati, quibus revelationibus tamen Deus neminem tentavit, nec  
Satanæ permisit, ut iis ad destructionem regni Dei abuteretur. Imo  
& Satanam in energumenis Christum confiteri jusfit, ut historia  
Evangelica declarat, non ad seducendos hominum animos, sed ut  
patefieret, ipsum Satanam Dei ac Christi subesse imperio.

§. 10. Ad Pythonis Endoriensis historiam me confero, quæ §. 10. d.  
I Sam. XXVI. legitur: Ubi Satanas huic fatidicæ diem interitus Sau- *Nec Py-*  
lis ac filiorum aperuisse vulgo putatur. Quique in ea sunt hæresi, *thonis En-*  
vel Satanam futura nosse audacter affirmant, vel hæc mulieri aut *doriensis.*  
Satanæ a Deo revelata esse contendunt, ut Saul tentaretur ac suo  
merito in errore confirmaretur. At neutra sententia *παρ εμοι κειται*  
firmo consistit talo. Primam inter alios tuetur Molinæus in Vate  
Lib. III. Cap. 1. ubi multa scribit Theologo indigna. Licet enim non  
negaverim, Spiritum hunc malum experientia edoctum ex cœli ele-  
mentorumve statu ac corporum natura, quædam, quæ nos latere pos-  
sunt, cognovisse; miror tamen, virum hunc alias doctissimum, Sa-  
tanam ex astrorum aspectu, vel communicatione cum angelis, vel sensu propheti-  
arum quem optime calleat, vel præscientia cladum quas Deo jubente infligat, mul-  
ta præf-



*ta præsire, affirmare ausum esse. Quid enim ex astrorum aspectu conjiciet? Siccine in astris hominum fata delineata sunt? Hæ voces paganum potius quam Christianum nedum Theologum decent. Rectius de talibus prodigiis & signis Augustinus: Non quia valebant animadversa sunt, sed animadvertendo atque signando factum est ut valerent de Doctr. Christ. lib. 2. Quanta sit cacodæmonum cum sanctis angelis familiaritas, ego quidem ignoro, Sacræ saltem literæ nihil de hoc commercio memorant. sensum prophetiarum quousque calleant, vel an dispositiones Dei & olim Prophetis concionantibus exceperint & nunc lectionibus resonantibus carpant, ut scribit Tertull. Apol. c. 22. non determino, aut multiplicem ei ignorantiam, dubitationem, errores quoque & oblivionem, post Gish. Voetium Joannes Wayenus tribuere non veretur contra Beckerum pag. 32. 33. In hac quoque sententia veteres fuere Christiani. Minucius Felix Octav. cap. 27. Oracula efficiunt (dæmones) falsis pluribus involuta; nam & falluntur & fallunt, ut & nescientes sinceram veritatem, & quam sciunt in perditionem sui non consistentes. Clades plagasque per ipsum hominibus infligi a Deo, Scriptura docet; sed ubi legitur, eas plures annos diesve prænosse? Gratis ergo plura hic finguntur. Neque Satanæ aut mulieri a Deo cladem Saulis revelatam esse crediderim, ob fonticam §. 8. supra Clerici verbis allatam rationem. Totum itaque hoc vaticinium, meris conjecturis, visionem vero ac sermonem imposturis Pythonis hujus, post Antonium van Dale ac Clericum aliosque tribuere non vereor. Quorum rationes exscribere non vacat. Attento lectori patebit (1) non fuisse hic veram Samuelis animam, quod cum Judæi quidam incaute asseruerint, Samaritanis ansam dedere Samuelem ipsum necromantias insimulandi, ut Relandus in Dissert. de Samaritanis me docuit. (2) Nec præcise proxime sequenti die hanc cladem accidisse videri: saltem animæ Saulis ac Jonathæ non in eundem abiere locum. (3) Prædicta conjecturis assequi haud difficile erat. Sique hic veritatem oracula tetigere, potuit inter multa mendacia industriam casus imitari; ut Minucius ait. (4) Neque id singulare erat, quod mulier Saulem postea demum agnovisse simulaverit, cum ipse suo se sermone & statura fortassis procera detexerit v. 10. (5) Denique Saul nihil quidquam vidisse legitur, sed mulier. Vel si quid vidit, quod Scriptura non dicit, id a muliere subornari potuit, quin & loquela ab alio fraudis conscio*



conscio proferri: ut taceam multos  $\Delta\Omega\text{N}$  &  $\epsilon\gamma\gamma\alpha\sigma\tau\iota\mu\upsilon\theta\omicron\nu$  eam quæ ex ventre loqueretur interpretari. Qui  $\Delta\Omega\text{N}$  serpentem reddunt, non semper tamen diabolum in his operatum largiuntur. *Wayenus contra Beckerum* pag. 530. *En so is Oobh de oude Slange, de Satan, of waarlik werkende, of voorgewent van's Duyvels dienaers en dienaressen.* Et potuisse Satanam (quid ni & mulierem?) conjecturis quæ prædixerat assequi, ipsamque forte Pythonem, Saulem nihil videntem decipisse, glossa in bibliis Tossani insinuat. Ita ut nullus in hac historia vel prophetiæ veræ vel vero miraculo sit locus.

§. 11. A nonnullis etiam in hanc rem proferuntur ea, quæ Mi- §. 11. e.  
cha narrat 1. Reg. XXII, 19. - 22. Vix istius loci mentionem fe- *Nec Spiri-*  
cisse, nisi Knibbenius in Historia Prophetarum Achilleum robur ei *tus decep-*  
inesse credidisset, ut probet Satanæ etiam a Deo occulta ac futura *toris. 1.*  
manifestari Lib. IV. Cap. 5. §. 9. n. 7. Parabolam hic a Propheta *Reg. 22.*  
narrari aut visionem Symbolicam, tam certum est, quam quod cer-  
tissimum, qualis & Job. 1 & 2. capp. occurrit; tale enim Deum  
cum Angelis aut Dæmonibus habuisse revera consilium aut colloqui-  
um, nemo sanus dixerit. Et quid quæso hic Satanæ revelatum est?  
quid prædixere prophetæ instigante Satana nisi mendacia secundum  
Jer. 27, 9? quis inde concludet: Deum Satanæ futura revelare ad  
homines in errorem ducendos? Permittit utique, Satanam pseudo-  
prophetas seducere & per istos populum, sed id circo neque arcano-  
rum suorum eum facit participem, neque suam potentiam commo-  
dat ad patranda opera supernaturalia.

§. 12. Ex novo denique Testamento duo loca objici possent. §. 12. f.  
Alter de Simone Mago Act. VIII, 9. 13. Alter de ancilla habente *Nec exem-*  
Spiritus Pythonis XVI, 16. Sed quod Simonem attinet, nihil ist- *plis e N.*  
hic de ejus miraculis; tantum quod  $\pi\rho\upsilon\pi\eta\rho\chi\epsilon\nu\ \epsilon\nu\ \tau\eta\ \pi\omicron\lambda\epsilon\iota\ \mu\alpha\gamma\epsilon\upsilon\omega\nu$  *T. id ad-*  
 $\kappa\alpha\iota\ \epsilon\zeta\iota\varsigma\omega\nu\ \tau\omicron\ \epsilon\theta\nu\omicron\varsigma\ \tau\eta\varsigma\ \Sigma\alpha\mu\alpha\rho\epsilon\iota\alpha\varsigma$ , non sane veris miraculis, nam da- *strui potest*  
ta opera addit, Lucas:  $\lambda\epsilon\gamma\omega\nu\ \epsilon\iota\nu\alpha\iota\ \tau\iota\nu\alpha\ \epsilon\alpha\upsilon\tau\omicron\nu\ \mu\epsilon\gamma\alpha\nu$ , igitur revera ma-  
gnus non erat operibus, sed videri volebat. Neque operæ pretium  
puto, quas prisca Christiani de eo credidere fabulas, refellere. Ex-  
emplum vero ancillæ quæ per Spiritum  $\pi\upsilon\theta\omega\nu\omicron\varsigma$  Paulum atque  
Silam  $\delta\epsilon\lambda\omicron\varsigma\ \theta\epsilon\omicron\varsigma\ \upsilon\psi\iota\varsigma$  proclamabat, Thesin nostram mirifice confir-  
mat, ipsos quoque dæmonas regno Christi inservire debere; tantum  
abest ut illam evertat. Ac licet hoc divinorum virorum elogium





secundum veritatem pronunciaverit impurus Spiritus, quales tamen fuerint *μαρτυραι*, quibus antea heris suis *εργασιαν πολλην παρειχε* hæc ancilla, haud memoratur. Sæpius contigisse, ut vera prædixerit, ex eo conjicitur, quod alioqui lucrum non attulisset heris. Id vero & Cingaris nostris sæpe accidit. An inde Satanam futura prædicere colligemus?

§. 13. Cum itaque omnia quæ e Sacris objici possint, diluerim, *Conclusio.* superfluum esse reor, quæ e profanis maximam partim fabulosis scriptoribus adferuntur, examinare. Sic enim non dissertatio sed volumen esset scribendum. Præcipue si quæcunque Roma *επιτομη της δαισινδαιμονιας* de suis sanctorum, reliquiarum, statuarum etiam miraculis fingit, cum iis conferre luberet. Omnia ista vel fraudibus, vel artibus naturalibus, vel & dæmonis operâ, non tamen miraculosâ, fieri certus sum; cum *Deus faciat miracula solus*, cujus nomen sit benedictum in secula.  
Amen.

## COROLLARIA de Reunione Protestantium.

1. **S**chisma inter Protestantes Ecclesiæ Christianæ naxus est, ejus incrementa vehementer impediens.
2. Sine causa justa separationem hanc institutam asserimus.
3. Omni itaque cura in id incumbendum est, ut curentur hæc vulnera filia Zijonis.
4. Qui hanc unionem impediunt, sunt Satana Ministri.
5. Nec excusandi qui hanc rem negligenter tractant, qui enim non est pro Christo, est contra ipsum.
6. Hanc reunionem, si debito modo quæatur, in se esse possibilem statuimus, nisi vitio hominum reddatur impossibilis.
7. Due tantum ad hanc reconciliationem sunt viae, vel ut omnes in articulis controversis eandem amplectantur sententiam, vel ut quævis dissidentium pars suis inherens sententiis, alteram tamen fraterno complectatur amore. Priorem appellabimus *Viam* conformitatis omnimodæ; Alteram vero *Viam* Tolerantiæ.
8. Prio-



8. Priorem Viam omnino impossibilem esse statuimus, aut si quoad externa possibilis reddatur, esse tyrannicam sive Papalem.
9. Quod ut pateat, considerandum est, omnimodam conformitatem iterum duplici modo quari posse: Vel per viam demonstrationis ad conscientiam s. persuasionis, Vel per Viam auctoritatis s. coactionis; auctoritas enim humana & coactio eadem sunt, licet gradu differant.
10. Via auctoritatis per ipsa Protestantium principia eliminari debet, cum & sacris literis & sanae rationi contrarietur: neque, si ea locum habuisset, unquam contra abusus Papales protestari licuisset.
11. Via demonstrationis ad conscientiam, quamvis semper calcanda sit, ea tamen omnes & singuli de veritate huius aut illius controversiae convinci nequeunt neque illud quoad omnes controversias necesse est.
12. Ratio duplex est, altera a parte rei seu objecti, altera a parte personarum seu subjecti recipientis.
13. A parte rei obest, quod nonnullae controversiae caput humanum excedant, ut sunt e.g. abyssus consiliorum divinorum, quorum βασις Paulus ipse ignoravit: quodque in multis non nisi ἐκ μέρους γινώσκωμεν, ἐκ μέρους προφητεύωμεν.
14. A parte subjectorum obstat, quod multi sint inter Christianos νηπιῖοι s. infantes, quorum cognitio infirma est.
15. Nunquam ergo in his terris obtinebitur haec omnimoda conformitas, nisi ultimis temporibus omnes sint τελειοὶ futuri.
16. Neque unquam talis conformitas in ulla Christianorum secta ubicunque terrarum existit: ita ut Reipublica Platonica merito illam comparemus.
17. Sola itaque restat Via Tolerantiae.
18. Per Viam Tolerantiae non intelligimus illam, qua dissentientibus aëris atque communis matris terrae usum concedimus, atque a persecutionibus abstinemus. Istam enim tolerantiam etiam Judaeis & Muhammedanis debemus.
19. Sed per Tolerantiam hic in sensu strictiori intelligimus fraternam cum fratribus disidentibus communionem externam atque internam, qua in rebus fidei fundamentalibus uniti, errores in rebus non fundamentalibus toleramus.
20. Haec tolerantia in ipsis S. literis jubetur Rom. 14, 1. Phil. 3, 15.
21. Haec Tolerantia inter Protestantes, in se omnino possibilis est.
22. Articuli inter Protestantes controversi non evertunt unicum fidei fundamentum, quamvis aiterutra factio in errore sit.
23. Quamvis ex alterutra sententia consequentiae neci possint, fundamentum fidei evertentes, illae tamen consequentiae si ore atque praxi ab iis refutentur, illis imputari nequeunt.



24. *Pertinacia in errore vel levisimo quamvis sit error fundamentalis, de ea tamen non homo sed solus Deus iudex est.*
25. *Tolerantia talium errorum per se non fundamentalium, fidei unitati nihil officit.*
26. *Neque illa cum veritatis dispendio conjuncta est, sed errantes Christiana caritate tolerat.*
27. *Imo & ad detegendam veritatem conducit, quæ velo auctoritatis humane nunquam tegitur.*
28. *Hæc Tolerantia iisdem mediis reducenda est, quorum neglectu Schismata inter Reformatos s. Protestantes irrepserunt.*
29. *Causa Schismatum inter Protestantes, ut ingenue dicamus, fuere affectus humani.*
30. *Hi affectus si abnegentur, reunio per tolerantiam facillima foret.*
31. *Qui tamen illam impediunt, sunt αἰσχρολογῆται neque iudiciū Dei effugient.*
32. *Neque tamen & hi pacis turbatores cogi vi armata vel brachio seculari debent, ut tolerantia tali subscribant: sed iudicio Dei relinquendi sunt.*
33. *Impediri tamen possunt ac debent, ne convitiis, pacis amantes proscindant, aut gravius quid in illos decernant.*
34. *Quamvis nec inter Reformatos hi pacis turbatores defuerint, eos tamen quoad maximam partem Lutheranis in amore pacis palmam præripuisse sine jactantia defendimus.*
35. *Quod vel ex eo apparet, quod vix Theologus inter Reformatos extiterit unquam, qui Lutheranorum errores esse exitiales pronuntiaverit; multi vero ab alia parte fuerint sintque: etiam nunc, qui Reformatos ad Orcum relegare non erubuerunt.*
36. *Quod cum vir sapiens ita interpretetur, ut eos Christi regulam magis observare credat qui caritatem magis demonstrant; sunt tamen, qui inde efficere populoque persuadere nituntur, tutiorem esse viam ad salutem si eos Duces sequamur, qui alios condemnant, a quibus tamen ipsi non condemnentur.*
37. *Hoc argumentum vulgo licet videatur speciosum, perinde tamen est ac si quis ita ratiocinetur: Hic Sepiasarius suam tantum commendat panaceam, si aliis medicinis utamur nobis moriendum pronuntiat. Medicus vero, quamvis in panacea sepiasarii multa peregrina sint admixta, posse tamen conducere ad sanitatem concedit. E. cum Medicus non condemnet Sepiasarium, sed Sepiasarius medicum, hinc tutius erit sequi consilium sepiasarii.*
38. *Quamvis, ut directe respondeamus, in rebus fidei non niti debeamus hominum suffragiis: Et Res ad salutem necessaria secundum omnium Protestantium hypothesein & Sacrarum literarum monita a quovis fidelium dijudicari possint ac debeant.*







